

*Alexandre  
Le Forgeron*

20151

(47)  
1872

LA  
HARANGVE  
D'ALEXANDRE  
LE FORGERON,

1614.

Prononcee au Conclaue des  
Reformateurs.

PROVERB. 20.

*Le Roy seant au trône de iugement, dissipe tout  
mal par son regard.*

---

M. DC. XIV.

1688  
coll.  
M. S.

L A

HARANGUE

D'ALEXANDRE

LE FORGERON,

Prononcee au Consistoire des

Religionnaires.

Proverbe de.

Le Forgeron est un homme sage, industrieux, et laborieux.

---

M. DC. XIV.



## H A R A N G V E.

**P**AR ma foy, Messieurs, si vous me demandiez ce que i'ay à proposer sur ce tapis, ie serois bien empesché de vous le dire, tant ie voy d'embaras aux affaires de la Resformation, & n'en faut point mentir, que si i'eusse creu d'enfourner si mal, ie ne fusse iamais bougé de Paris d'aupres de mes maçons : Mais puisque la fatalité en ordonne ainsi, encorés ne faut-il pas ietter le manche après la coignée. Ma consolation est que ie ne seray pas seul celebré en l'histoire, pour auoir plus entrepris, que ie n'ay peu faire. Car Monsieur Rose iadis Euesque de Senlis, se trompa aussi bien que moy en son calcul, s'imaginant la leuee de plusieurs milliers de soldats, comme vn exain de mouches en l'air, pour le secours de la sainte Ligue, à ne prendre mesme ( disoit ce bon Prelat ) qu'un homme pour clocher. Certes à ce que ie voy les bonnes coustumes se perdent, tout s'altere, tout se corrompt, il n'y a plus d'ardeur ny de zele à bröüiller, comme i'ay veu autresfois en ma ieunesse, sur tout lors que la feu Royne Mere me vouloit honorer

gratis de la Capitainerie de la Bastille, si iene  
 fusse deslogé sans trompette, & quand de  
 plus fraische debte, vn homme que vous co-  
 gnoissez, curieux de sçauoir toutes choses,  
 s'en alla en diligence apprendre l'Allemand  
 chez le Comte Palatin, pour se rendre tous-  
 jours plus vtile au seruice de Henry quatries-  
 me son bien-faicteur, apres l'auoir assisté  
 d'vn memorable secours au siege d'Amiens,  
 & en la guerre de Sauoye. Tout en fin n'est  
 aujourd'huy que froideur & lascheté de cou-  
 rage, à reformer les Royaumes à ma mode.  
 Les Coqs de nostre Parroisse, que ie croyois  
 estre les plus boüillans, ont tous à ce coup  
 esté froids comme glace, les vns par amour  
 & respect, les autres par foiblesse & manque  
 de pouuoir. Il n'est pas iusqu'à ce grand  
 Pontife, qui ne s'amusant plus aux visions  
 de son Mystere d'iniquité, me veut mettre à  
 ceste heure en ombrage parmy toutes les Sy-  
 nagogues de la France, ausquelles il ne chante  
 par ses lettres que les benedictions de la paix,  
 en la liberté de leurs consciences, leur faisant  
 accroire que ie suis homme qui ne veux que  
 faire mes affaires, & puis les laisser là, com-  
 me ie fis ( dit-il ) à l'assemblée de Saumur.  
 D'ailleurs, les Mouchars que i'ay dans les  
 Prouinces, me donnent aduis que celles où  
 nous presumons d'estre les Maistres, disent  
 tout haut qu'elles ne veulent point taster de  
 nostre Reformation. Car faisans la guerre le



premier mal tomberoit sur leurs testes, soit en gardant eux mesmes nuit & iour les portes & les murailles de leurs villes contre leurs voisins, soit en y receuant garnison, veu la seruitude où ils l'engageroient, si leurs vies & leurs fortunes despendoient de la garde d'autrui, les bons Citoyens se contentans de viure paisiblement du leur, n'y ayant que quelques affamez & saffraniers qui desirent la picorée du bœuf & de la vache. Quand à des hommes pour en faire de grandes leuees, on m'escriit qu'ils en ont fort peu de reserue, & presque point qui vueillent quitter de veuë le tuyau de leur cheminee, pour me venir trouuer si loing, quelque bruit que nous facions courre, qu'il y a de l'ordre & de la police en nos troupes, sous couleur de trois ou quatre miserables que nous auons desia faict pendre, pour auoir baisé les seruantes de leurs hostes en prenant congé. Car il n'y a soldat pour d'amoureuse complexion qu'il soit, qui ne se passe volontiers de ce bel ordre. Les Ministres font aussi grandement apprehender à leurs oüailles, la desolation qui seroit ineuitable à tout plein de bergeries esparfes ça & la dans le Royaume, comme est entre autres l'Eglise Metropolitaine de Charanton, toutes lesquelles maudiroient celuy, qui les exposant en proye, auroit troublé leur repos.

O temps! ô mœurs! quel est cest endure-

ciffement de cœur ? Où est ceste première ferueur de nos peres ? Où est le zele furieux & turbulent de nostre Eglise primitive il y a environ quarante ou cinquante ans ? Tout est tellement refroidy, que i'oserois gager que de cent Huguenots qu'il y a, il ne s'en trouueroit pas le quart qui endurast le feu, pour maintenir dans Rome, que le Pape soit l'Antechrist. Et si pour le bien de la Reformation, il y en falloit tout presentement enuoyer deux, ie croy qu'à peine fourniroit-on d'un second avec moy.

Vous vous souriez Messieurs, de me voir ainsi tordre la moustache, & que i'aye pris pour corps de deuise en ma cornette six paires de lunettes sur vn nez haut en couleur avec ces deux mots Grecs. **V N D E A V X I L I V M** ? De regarder du costé de l'Allemagne pour en tirer des Reistres & des Lansquenets, ie ne me suis pas encore saisy des reliques & des calices de Saint Denis pour les payer, estimant qu'à peine sortiroient-ils du pays sur ma simple parole. Pour l'Angleterre, ce Roy est si pacifique & si conscientieux à force de lire le liure des Roys qu'il hayt comme le diable tous suiets qui se mutinent contre leurs Souuerains, parce que luy mesme estant du mestier, a interest à l'inviolable conseruation de leur autorité. Quant aux Republicains nos voisins, ce sont vraiment gens qui s'entendent des mieux à



la reformation des grandes Monarchies, & qui les trouuent bien plus belles en pourpoint, que non pas reuestues de ces longues tuniques Royales : Mais ie voy bien qu'en l'estat que sont aujourd'huy leurs affaires, ils ont plus besoin de la France que d'Alexandre le Forgeron. Il n'y a non plus que faire pour nous en Suisse. Voila comme tout nous manque, & comme ie recognois que l'Almanach de Beauregard n'est qu'un menteur avec ses predinctions fabuleuses, n'y ayant eu villes capitales, Parlemens, peuples, ny Noblesse de marque, qui se soient laissez engluier comme font les moineaux quand il neige. Car tout ce que nous auons peu faire depuis trois mois, ç'a esté de ramasser çà & là quelques quatre mil hommes de pied, bons que mauuais, avec vn peu de caualerie pour nous venir promener sur le paué de Soissons, où nous sommes entrez en pompe, afin qu'on ne die point que si apres Pasques nous faisons plus de bien, qu'on n'en esperoit de nous en Carefme, ce ne soit pas par foiblesse de pouoir proceder à la reformation, cest espouuentail n'ayant point si peu operé, qu'il n'ait desia enchery à Paris le foin, l'auoine, le fagot, le coteret, & si le bois de corde hausse vne fois à la Greue, il y en aura de mal chauffez.

Or de penser faire le fin avec vous, vous ne me cognoissez que trop de par Dieu. Il n'est pas icy question de se mettre sur les bel-

les paroles, & de vous faire vn long discours  
 sur ma fidelité & bonne affection au seruice  
 de leurs Majestez, c'est chose que vous n'i-  
 gnorez pas, & que vous sçauiez autant ou  
 peut estre mieux que moy. Il faut seulement  
 aduiser ce qui se peut faire maintenant, à ce  
 que ces Messieurs remportent quelque con-  
 tementement de ceste conference, sur l'yssuë de  
 laquelle toute la France a aujourd'huy les  
 yeux iettez. Pour moy estant homme accort  
 qui sçait faire & deffaire, afin qu'on ne m'e-  
 stime pas vn boutefeux qui se vueille rendre  
 l'horreur de la posterité, si on m'en veut  
 croire, ie suis d'auis que tout ce qui s'est faict  
 iusqu'à present, se soit passé comme par ieu,  
 & que nous acceptions la bonne volonté  
 de la Royne, retournans iouyr doucement  
 de sa bienueillance, & participer aux conti-  
 nuelles graces & faueurs, que ceste bonne  
 Princesse, nous a tousiours departies, dont ie  
 ne seray iamais le moins du monde ingrat, re-  
 cognoissant ses liberalitez comme ie fais.  
 Et si selon vostre goust il y a quelque chose  
 à desirer au gouuernement du Royaume,  
 soit pour la distribution des charges, soit  
 pour le soulagement des peuples, remettons  
 cela à la tenuë des prochains Estats gene-  
 raux, puisque sa Majesté auoit desia resolu  
 de les conuoquer auant que nous les eus-  
 sions demandez. Si cependant on trouue  
 bon que ie soulage Monsieur le President

Jeannin



Jeannin au maniement des finances, i'engage ma foy & mon honneur, d'y faire mieux mes affaires en trois mois, que ce bon homme n'y fera les siennes en toute sa vie. Je ferois bien aussi ce me semble le Chancelier à vn besoing, pour bailler force cire verte aux gens d'honneur. Si mesme l'office de Connestable n'est supprimé par mort, ie l'aymerois bien autant pour moy que pour vn autre.

I'estime qu'il vaut mieux s'accommoder ainsi à l'amiable, sans toutesfois en faire semblant d'abord, afin de mieux faire valoir le talent. Car d'entreprendre contre la Royauté, nulle guerre n'est iuste si elle n'est necessaire. Or de necessité il n'y en a certes point, l'Estat estant pacifique & florissant comme il est, ains ce seroit vne violence du tout inique, quelque pretexte que nous empruntions du bien public, veu que la voix du peuple, de qui nos troupes deuorent la substance, crie vengeance deuant Dieu, la seuerie iustice duquel armera tellement le bras du Roy, de force & de puissance, que nous demeurerons en fin accablez en nos desseins, si nous n'allons au deuant de son indignation. Car tout passionné qu'on me croit estre, ie ne suis point si auetugle que ie ne voye bien, qu'à mesme temps que nous ferons les facheux & que nous aurons reietté les raisonnables conditions, que leurs Maiestez nous

offrent, on laschera apres nos fesses des Le-  
 uriers de si bonne race, que nous maudirons  
 l'heure d'auoir iamais entrepris vne si mal-  
 heureuse besongne. Et s'il nous arriuoit de  
 perdre en vn combat sanglant ce peu de for-  
 ces que nous auons, la reformation ne se-  
 roit-elle pas gaulée sans ressource? Où est le  
 Gentil-homme qui peust sortir de sa maison  
 à vingt lieues de nous, sans auoir soudain vn  
 Preuost dans sa basse-cour pour luy saisir &  
 confisquer ses biens à l'eternelle misere de sa  
 femme & de sens enfans? De vous asseurer  
 beaucoup de moy ny de mon chasteau, ou-  
 tre ce que i'ay à y penser plus d'une fois auant  
 que de me bander ouuertements contre le  
 Roy, vous pouuez bien croire que ie ne vous  
 souffrirois pas d'y entrer les plus forts, com-  
 me i'estime que nous sommes icy. Coura-  
 ge ô bons & fideles habitans de Soissons,  
 vous meritez d'auoir l'honneur d'estre des  
 premiers reformez apres Mezieres nostre fil-  
 le aînée. Tout cela meurement considéré,  
 ie concluds qu'il se faut accommoder au  
 cours du marché, ayant si mal pris nos me-  
 sures. Helas! ie ne cognois que trop l'hu-  
 meur des gens, que nous desirons se ietter  
 entre nos bras. Le sçay que toute nouveauté  
 plaist d'abord à quelques François: Mais ce  
 sont des ceruelles qui ne peuuent pas lon-  
 guement demeurer en vne mesme resolu-  
 tion. Ce qu'ils louient aujourd'huy, ils le



blâment demain. Ils controllent tout, ils murmurent de tout, & rien ne leur agree que ce qu'ils font; tel pensant bien faire l'homme d'Estat, qui a peine seroit bon Procureur de Chastelet. Bref ce sont esprits chagrins qui se plaignent de tout, qui s'ennuyent de tout, autant impatiens en la iouissance du bien, qu'en la souffrance du mal. De sorte que ne les pouuâs retenir par recompense de leurs seruiçes, n'en ayans le moyen, ny ne se voulans laisser beffler de vaines esperances, il est malaisé d'asseoir sur eux aucun fondement. Nous auons beau leur prescher que tout s'en va estre reformé en la Iustice, aux armes, & que les charges de la maison du Roy ne se vendront plus. Ce qui est bon à dire maintenant, apres que moy qui parle, ay pour exemple de reformation vendu à beaux deniers contans celle que i'y auois, la baillant au Seigneur que i'ay tousiours aimé, où pour mieux dire recherché, tant que i'avcreu qu'il me pouuoit ayder à faire mes affaires. Ne nous reposons donc que de bonne sorte sur ces giroüettes. Car quelque effor que prennent telles gens ils reuiennent tousiours loger à l'espée royalle, & quelques mutins qu'ils soient en la chaleur de leur mescontentement, ils trempent leur vin, ils reuiennent à eux, & aiment tousiours mieux vn grand Roy, soit mineur, ou homme fait, que de se voir asservis sous le ioug de tant de

petits Maistres & de petits Salmonées qui ne peuvent gresler que sur le persil. Avec cela il est à craindre que ce cauteleux serpent de diuision ne se glisse parmy vous, Messieurs, sur tout quand se viendra au departement des charges de ceste grande armée inuisible ( ie voulois dire inuincible ) dont vous ne serez pas si tost d'accord que du butin, lequel ie preuoye estre si reformé, que vous en aurez autant les vns que les autres. Je n'apprehende pas ceste diuision sans cause, parce que ie voy desia du refroidissement à quelques vns. Je ne sçay mesme si vous Monsieur qui faites si bonne chere à la reformation, auriez point quelque regret sur le cœur, s'il vous falloit estre delvny de vostre maison, adherant sur tout à vn heretique comme i'ay l'honneur d'estre, vous qui estes fils de ce genereux Prince, qui imitant la pieté de ses Ayeulx, n'espargna iamais son sang pour la deffence de la Religion Catholique, laquelle vous pouuez bien croire, que moy & mes semblables voudrions voir exterminée aux despens de vos propres testes. Et à ceste heure que ie parle d'accommoder les affaires, ie ne feindray point de vous dire rondement comme feroit vn Capucin, que le seul blasme & reproche qu'on vous peut faire que ie suis en vostre compagnie est capable de vous rendre odieux à toute la France, de craindre qu'on a que vous faciez aussi mauuais fruit



que moy, & qui estois né Catholique fils de bon pere & de bonne mere.

Regardez moy Messieurs, regardez-moy de trauers tant que vous voudrez, ie vous dy franchement que ie vous tromperois si ie vous allois promettant beaucoup de seruice, Vous voyez, ie suis vieux, cassé, gousteux, & si mal sain dans les corps, que ie ne suis pas pour viure si long-temps si Dieu plaist. Non que ie ne puisse dire sans me flatter, que ie suis assez vaillant de ma personne : mais au reste le plus malheureux homme du monde à la guerre. Vous sçauiez comme ie fus faict prisonnier en Flandres, vous sçauiez ce qui m'arriua à Dourlans, & n'en espere pas mieux en toute autre part, quoy que le bruit coure à Paris que ie me suis vanté de passer sur le ventre du regiment des gardes, avec ce peu d'infanterie que nous auons. Si ceste parole m'est eschappée ç'a esté en dormant, parce que ie ne dois pas ignorer, que les soldats de ceste trouppé ne soient autant de Lyons conduicts par des plus braues & valeureux Capitaines de la France qui m'en feroient bien tost perdre l'enuie. I'ay de plus reputation de n'estre pas fort bon Maistre, pour obliger les honnestes gens à suiure ma fortune, nul de mes seruiteurs ne s'estant iamais fait Banquier au sortir ne chez moy, D'ailleurs ie me voy en cest aage chargé d'enfans, & ne sçay cōme apres moy, ma Sou-

ueraineté leur seroit asseurez, si ie mourois aux mauuais graces du Roy, de la bien-veillance & protection duquel, ie la tiens autant que de droit que i'y aye. Ie regarde que si d'autre costé, i'auois pour ennemy vn Roy d'Espagne, ie ferois fort mal en voisins, & c'est ce qui me fait tant resuer sur ceste alliance, ne sçachant bonnemēt si ie la doibs persuader ou non. Si ie dy qu'il la faille sursoir, en attendant l'occasion de la rompre tout à fait, ie feray plaisir à quelques vns, à qui l'vnion de ces deux couronnes oste le moyen de pouuoir brouiller. Mais aureuers de la medaille, si la France ne la faisant point, auoit à viure en mauuaise intelligence, avec vn Prince si puissant, ie ne sçay pas si la frontiere & le dedans du Royaume en seroient plus asseurez, veu les diuisions & partialitez qui rongent les entrailles de cest Estat. Il y a tant à considerer là dessus, que pour n'y rien faire à l'estourdie, il vaut mieux remettre à en conferer à l'assemblée des trois Ordres, lesquels soubz le bon plaisir de leurs Maiestez resoudront s'il y a plus de iustice de reietter l'alliance du Roy d'Espagne qui est Catholique, que d'accepter celle du Roy d'Angleterre qui est Protestant, & si toutes deux ne sont pas à desirer pour le salut du Royaume.

Sur ceste attente ie vous conseille Messieurs, d'aller tirer le premier cartier de vos pensions à Paris, ne quittans pas le certain pour l'incer-



rain, comme fist le chien d'Esopé, qui prist l'ombre pour le corps. Car de vous resier sur moy, ie vous declare que ie vous pourrois fuire cinquante ans, auant que de faire marcher les Tresoriers de l'Espagne à vostre queue, n'y ayant d'autre part teston à prendre en ce pays, qui ne fust baigné dans les larmes de la vefue & de l'orphelin. Si vous vous en retournez vous me ferez vn singulier plaisir sans que vous preniez la peine de me reuenir voir, vos allees & venuës me coustant desia bon, dont ie me gratte les oreilles, & qui pis est ie n'en oserois encores demander recompense à la Royne, puisque la rigoureuse discipline de la reformation porte qu'il se faut du commencement oublier soy-mesme, & ne parler que du bien public, qui est vrayement ce que ie cherche.

le preuoy en fin que si vous ne vous rangez à vostre deuoir, le Sacrificateur ne ietta iamais tât de pechez du peuple d'Israel sur la teste du bouc qu'il chassoit au desert, que vous serez hays, maudits, & detestez d'un chacun, n'y ayât si petit Escolier qui ne fueillette son Calepin, pour y trouuer de nouuelles imprecations en vostre faueur. Ce n'est pas qu'on en vueille particulièrement à vos personnes, lesquelles on honore : Mais l'ambition, la rancune, la discorde, sont les mauuaises Conseilleres qu'on abhorre en vous, comme celles qui vous portent

à cest aveuglement, de ne considerer pas que tout ainsi que les brâches se seichent, & n'ont plus de vie le tronc de l'arbre estant porté par terre: De mesme si par vos tumultes & confusions vous auiez debilité la vigueur du Chef de l'Estat, vous qui estes les parties nobles de ce corps, vous verriez bien tost reduicts en vne piteuse condition, pour le peu de respect que vous rendroient des peuples que vous auriez affriandez au libertinage & à la desobeissance. Retournez d'oc Messieurs, retournez d'où vous estes partis. Car aussi biē n'y a-il point de Cour, ny d'autorité legitime, que là où est le Roy, ou son aueu, non plus qu'il n'y auoit point d'image viuante de Republique qu'à Rome, quoy que Pompée se vantaist de l'auoir emmenée avec luy, sous couleur de quelques Citoyens & Senateurs qui le suiuioint en campagne, & lesquels en leur foiblesse ne le peurent iamais garantir de sa ruine contre Cesar.

S. Paul à Timoth. Epist. 2. ch. 4.

*Alexandre le Forgeron m'a faict beaucoup de maux, le Seigneur luy rendra selon ses œuvres.*

F I N.





